

" مائدة " قصة قصير للكاتب محمد نوح



الثلاثاء 3 يونيو 2014 12:06 م

نافذة مصر

. اتفضلوا الغدا يا بهوات
الغدا متنوع ، يعني أراضي وفل ويط وحمام ورومي
وبترول وعيال وشباب وستات وفلوس ومرقة وغاز
ومحشي وبيتزا وفطير وعزب وجناين ومصانع .. كله كله ...
. اتفضل يا ممدوح بيه الورك ده
. تسلم إيدك .. اتفضل الصدر ده
. تسلم لي .. خد العزبة دي ابلعها
. لا والله ما حد واكلها غيرك أنا لسه واكل بير وخليج من شوية
. وأنا لسه واكل ألفين فدان خلاص مش قادر
. طب عشان خاطرني جرب الشركة دي طعمها يجنن
. إيه يا فوزية مابتاكلش ليه؟
. خلاص يا نبيل أنا بقيت ع الآخر .. ع الآخر ..
أكلت طريق 200 كيلو
. طب جربي مصانع الأسمنت دي بالصلصة والمايونيز
. يووه إنت عارف إنني با اضعف قدام أي حاجة حرشة ..
هات يا سيدي
. صفوت باشا .. سايب العيال دي لمين ..
. أكلت عشر كليات .. خلاص الحمد لله
. ياراجل وهو فيه أطعم من العيال الصغيرين ..
دوق المدرستين دول
. يا رجالة .. يا ستات ..
. نعمين يا باشا
. عارفين الحلو إيه؟
. كل اللي يبجي من سعادتك حلو
. الحلو قناة السويس
. ها ها ها ها
. بس مسلوقة عشان الباشا الكبير
. ألف سلامة عليه .. ماله ؟
. حامل ...
. سايين الكام قطر دولا لمين .. ما فيش حاجة تبات
كلوهم قبل ما يترموا في الزبالة
. فهمي بيه .. سايب العمولات دي لمين؟
. أصل أنا واكل عمولة القمح من 3 ساعات
. طب كامل جميلك وكل عمولة الدوا
. سفرا دايمه يا بيه ..
. هنيا يا بهوات

